



Mociéda
d'Izquierda
Asturiana

MANIFIESTU DE ZARAGOZA

Pola despenalización de los derivaos del *cannabis*

Dende l'aceptación per parte del Estáu español de los Convenios Internacionales de la ONX sobre Sustancias Narcótiques de los años 1961, 71 y 88, los derivaos psicotrópicos del *cannabis* considérense ilegales, poro, el Códigu Penal español, nel so artículu 368, diz que “Los qu'executen llabores de semu, elaboración, tráficu, o d'otru xeitu afalen, favorezan o faciliten el consumu ilegal [d'esta planta] (...) sedrán castigaos con penes (...) de prisión d'ún a tres años y multa del tantu al doblu [del valor de la droga oxetu del delitu]”. Sicasí, la xurisprudencia del Tribunal Supremu, acordies coles polítiques d'amenorgamientu de daños en cuestión de drogues, caldía más enraigonaes nes sociedaes desenvolvíes, y al empar colos drechos reconocíos na Constitución Española, cada vuelta ye más permisivu pa colos actos de semu pal autoconsumu y los de consumu compartíu. D'igual mente, los Parllamentos aragonés y catalán aprobaren entrambes mociones favorables al usu terapéuticu del *cannabis* en delles malures.

La prohibición del cáñamu, en definitiva, básase nun modelu de protección de la salú públicu (el drechu a la salú). Esti modelu paternalista, choca col drechu a la llibertá individual de los ciudadanos, que nesti casu afitaría que la salú en ciudadanos adultos namái podría protexese col preste de la persona afectada. Según el modelu de salú públicu, l'Estáu en considerando qu'una sustancia ye nocivo pa la sociedá a la que representa, creye lícites toles polítiques empobinaes a amenorgar o desanicar el so consumu na población. Asina, sedría lícito prohibir una sustancia, productu o asitiamientu que pudiere xenerar daños a la salú d'un segmentu de la sociedá, si esti amenorgamientu de la disponibilidad viniere acompañáu d'un amenorgamientu del consumu. La paradoxa ye que la prohibición del *cannabis* burlla esta máxima de mengua del so consumu. La razón, alcontrámosla en que la prohibición funciona como la mayor ferramienta de fomentu y espardimientu, al convertise, les anuncios y informaciones de los medios de comunicación, n'afaladores al consumu y al tener xenerao un movimientu social que tien como primer resultáu la difusión del *cannabis*, tomando l'Estáu nun axente que busca la igua pa un problema qu'enantes entamó.

Nel tarrén ilegal, anguaño, los contrasentíos de los artículos 23 h) y 25 de la Llei Orgánica 1/92 de Seguridá Ciudadana, que castiguen per vía alministrativa lo mesmu'l consumu que la tenencia en llugares públicos, condenen al consumu y a la tenencia de *cannabis* a un asitiamientu de pseudo-illegalidá. No que cinca al sistema penal, los más de los presos del Estáu español tán rellacionaos direuta o indireutamente col consumu o col tráficu de drogues. Ye preciso, d'igual xeitu, sorrayar l'altu númberu de recursos humanos y económicos emplegaos na llucha contra'l tráficu de los derivaos del *cannabis*,

al ser la sustancia ilegal de consumu y tráficu que s'alcuentren davezu más espardíos dientro l'Estáu español, y l'afogamientu dientro'l sistema xudicial-penal, a los que los xuicios y el cumplimientu de les penes en cárcel, nesti ámbitu, empobinen.

Paradossalmente, ye precisu conseñar qu'existen otres sustancies llegalles que, n'abondos aspectos, puen considerase lo mesmu o quiciabes más nocives que'l *cannabis*. L'alcohol y el tabacu tan reconocíos como narcóticos pola Organización Mundial de la Salú. Na clasificación de sustancies narcótiques acordies cola so peligrosidá de la OMS, que les xebra en 4 grupos, mentes el *cannabis* alcuéntrase nel grupu IV, el de les sustancies con menor peligrosidá, l'alcohol ta allugao nel grupu II. L'alcohol y el tabacu, por embargu, afáyense abellugaos polos impuestos indirectos y pola presión económico de les grandes multinacionales productores, polo tanto, gocien de l'aceptación de les estayes financieras, amás de tar aceptaos socio-culturalmente.

En cuantes a los sos efectos, los derivaos del cáñamu producen sensaciones d'euforia, relaxación, aumentu de les capacidaes socializadores, de la gana comer... Nos estremos, por un consumu descomanáu, puen producise crisis d'hipotensión o episodios d'ansiedá o paranoia, que davezu aparen, como muncho, nun par d'hores. La fumada abusiva y continuada pue llegar a producir bronquitis crónica, por cuenta l'alquitrán que, como toa sustancia vexetal, produz la so quema. Otros efectos foron investigaos con resultaos contradictorios. Esti riesgu pue reducise, por exemplu, col emplegu de vaporizadores. Y en nengún casu, a la contra de lo qu'asocede con otres drogues como l'alcohol, el MDMA, o con delles melecines, el consumu escesivu o intoxicación con *cannabis* tien producío por sí mesmu l'acabación, dao que nun tien una dosis mortal.

Somos asina mesmu conscientes de que'l *cannabis*, lo mesmu qu'otres drogues como'l tabacu, el café o dellos psicofármacos, pue inducir daqué tolerancia, síndrome d'astinencia y un arreyu físicu y psíquicu. Por embargu, los niveles d'estos efectos son baxos o perbaxos en comparanza coles demás sustancies psicoactives llegalles y ilegales.

Per otru llau, la prohibición del *cannabis* ta torgando dalgunos de los amplios usos mercantiles y melecinales del cáñamu. Como textil, a lo llargo de milenios foi fonte de cordería y texíos. Como fonte d'enerxía, yá sía como biofuel o biomasa, pue dar rendimientos superiores a cualquiera de les fontes qu'anguaño tan desendolcándose. Amuesa perbones cualidaes como material de construcción aislante térmicu y acústicu. El papel de cáñamu ye'l de mayor resistencia y dura, reciclable hasta 7 vegaes y faciendo la cuarta parte de contaminantes y cuatro vegaes más de producción per hectárea que la fabricación de papel sobre celulosa de madera. Güei en día, cuenten al rodiu de 25000 productos comerciales derivaos del cáñamu, qu'inxeren, amás de lo citao, cosmética, xabones, alimentación, zapatos de frenu... Nel campu la medicina, numerosos estudios amuesen qu'esta planta contién sustancies (como'l THC) qu'actúen o podríen actuar como fármacos benignos pa tratar un ampliu númberu de malures (glaucoma y antiemético pa pacientes con cáncanu o SIDA, ansiedá, esclerosis múltiple, desórdenes y lisiones neurolóxicos...).

Amás, cualquiera que foren les causes qu'orixinaren la prohibición, xeneren, de fechu, la existencia de mafies, de corrupción y delincuencia venceyaes al so tráficu. D'igual miente, l'adulteración del *cannabis* derivada d'esti allugamientu produz un dañu perbultable a la salú, que fai medrar esponencialmente los que xenera la sustancia en sí

mesmo. Neto, cola imposibilidad de desaniciar la ufierta de drogues, que ye siempre regulada pola demanda, y la enorme extensión del consumu (lo que refuga qu'una supuesta normalización provocare que'l consumu algamare llugares a los que nun llegare enantes la sustancia), que s'esparde per tolos estratos sociales y per toles zones xeográfiques (camudando a un 30% de la población mozo, consumidor, n'illegales), asina como daos los efectos contradictorios na mengua del consumu que plantea la prohibición, los firmantes d'esti manifiestu afirmamos que:

- **La prohibición del *cannabis* non solo nun ye eficaz nel amenorgamientu del consumu d'esta sustancia énte la población sinón qu'amás lo esparde.**
- **La prohibición del *cannabis* desenvuelve un fuerte aumentu del dañu a la salú ente los consumidores pola adulteración que'l "mercáu negro" conlleva.**
- **La prohibición del *cannabis* xenera un importante dañu social, dándo-y poder dientro la sociedá a organizaciones delictives, qu'obtienen beneficios, qu'una supuesta normalización fadría repercutir na sociedá en forma d'impuestos, llicencies...**
- **La prohibición del *cannabis* supón un grave agraviu comparativu frente a otres sustancias psicoactivos ilegales, que representen un mayor dañu a la salú de las persones.**

En resume, les organizaciones firmantes concluyimos que'l marcu llegal actual nun algama les metes que se propunxeren y, amás nun respeta'l drechu a la llibertá individual d'escoyeta, nin el drechu a la salú de los ciudadanos, siendo más negativu l'asitiamientu d'anguaño que la orixinal proteición de la salú públicu y camudándose nuna igua ineficaz énte'l consumu d'esta sustancia.

Darréu lo anterior, los qu'embaxo roblen, asumiendo'l nuesu compromisu como organizaciones que recueyen les demandes sociales y moces y como impulsores d'iniciatives qu'ayuden nel procesu constructor d'una meyor sociedá, camentámonos qu'estos argumentos son suficientes dafechu pa demandar los cambeos normativos necesarios col envís de que'l *cannabis* y los sos derivaos pasen a ser sustancias ilegales, tando permitío la so sema, comerciu y consumu. Asina que, paeznos necesaria y pidimos al Gobiernu del Estáu Español, poro, una normalización controlada del *cannabis*, yá sía como'l tabacu, a la vienda n'establecimientos autorizaos, yá sía como los fármacos, de vienda en farmacia con receta médica, qu'habrá dir acompañada d'una política preventiva y d'información afayadiza sobre estes sustancias. Del mesmu mou, pidímos-y al Gobiernu del Estáu que favoreza'l debate sobre esti tema dientro de les estayes oficiales europees y internacionales.

Zaragoza, a 26 díes andaos d'ochobre del 2002.

à CHOBENALLA ARAGONESISTA
à JUVENTUDES SOCIALISTAS ARAGÓN
à IZQUIERDA UNIDA-JUVENTUD ARAGÓN
à JOVES D'ESQUERRA VERDA-JOVES AMB INICIATIVA

à JOVENTUT NACIONALISTA DE CATALUNYA
à JOVES DE UNIÓ DEMOCRÀTICA DE CATALUNYA
à GAZTE ABERTZALEAK
à JOVES D'ESQUERRA NACIONALISTA-PSM
à JERC (JOVENTUTS D'ESQUERRA REPUBLICANA DE CATALUNYA)
à BLOC JOVE
à JUVENTUDES ANDALUCISTAS
à MOCEDÁ D'IZQUIERDA ASTURIANA
à ANDECHA MOCEDÁ
à DONA-JOVES NACIONALISTAS PER LA IGUALTAT
à UNIBERS